

0.0.1 dutiya paṭipadāsuttaṃ

0. sāvatthiyaṃ:

1. gihino vāhaṃ bhikkhave, pabbajitassa vā micchā-paṭipadaṃ na vaṇṇemi. gihī vā bhikkhave, pabbajito vā micchāpaṭipanno micchāpaṭipattādhikaraṇahetu nārādhako hoti ñāyaṃ dhammaṃ kusalaṃ. katamā ca bhikkhave, micchāpaṭipadā, seyyathidaṃ: micchādiṭṭhi micchāsaṅkappo micchāvācā micchākammanto micchājīvo micchāvāyāmo micchāsati micchāsamādhī. ayaṃ vuccati bhikkhave micchāpaṭipadā. gihino vāhaṃ bhikkhave, pabbajitassa vā micchāpaṭipadaṃ na vaṇṇemi. gihī vā bhikkhave, pabbajito vā micchāpaṭipanno micchāpaṭipattādhikaraṇahetu nārādhako hoti ñāyaṃ dhammaṃ kusalaṃ.

2. gihino vāhaṃ bhikkhave, pabbajitassa vā sammā-paṭipadaṃ vaṇṇemi. gihī vā bhikkhave, pabbajito vā sammāpaṭipanno sammāpaṭipattādhikaraṇahetu ārādhako hoti ñāyaṃ dhammaṃ kusalaṃ. katamā ca bhikkhave, sammāpaṭipadā, seyyathidaṃ: sammādiṭṭhi sammāsaṅkappo sammāvācā sammākammanto sammājīvo sammāvāyāmo sammāsati sammāsamādhī. ayaṃ vuccati bhikkhave, sammāpaṭipadā. gihino vāhaṃ bhikkhave, pabbajitassa vā sammāpaṭipadaṃ vaṇṇemi. gihī vā bhikkhave, pabbajito vā sammāpaṭipanno sammāpaṭipattādhikaraṇahetu ārādhako hoti ñāyaṃ dhammaṃ kusala'nti.